

2 Timoti

Pol mij kisen nib ak Timoti nop ñu kil tikak

1 ¹Yad Pol. God gek niñil yad Krajs Jisas nop cig gil, komiñ kisen nib komiñ per midep ag lak ak dipin. Niğ niñil, God ne ke agek, Krajs Jisas minim tep dad ameb bi ne alap midebin.

²Ñi midmagil yad Timoti, nep mij nibaul ñu kil tikebin. Bapi God, Bi Kib cin Krajs Jisas, nep yimiğ niñil, di tep gil, kod mid tep ger me, nak kapkap mid tep ginimin.

God minim ag ñobin ak, nabiñ ma ginimiñ

³Apis based sikop God nop wög gi ñi mideligipal rek ak, yad ak rek nep gos omal ma niñil God nop nep gos niñil, wög ne gi ñibin. Yad piñ nab kislím eyañ God nop sobok gipin ak, yad per nep yib nep aglig gi, God nop tep agebin. ⁴Sil agnak ak gos niñlig gi midebin. Nib ak, nep am niñil, yad miñ miñ yib ginigain.

⁵Nak gos nokim ar nep niñil Krajs Jisas nop niñ di wös gipan ak niñlig gi midebin. Napis Lois eip, nanim Yunis eip, Krajs Jisas nop niñ di wös gil midöligipir rek, nak ak rek nep nop niñ di wös gipan, agil gos nipin.

⁶Nak Krajs Jisas nop niñ di wös gipan rek, yad nep agebin, ñinmagil yad di nabic ar nep ak len, God nep tap tep ñak ak, gos niñlig gi midenimin. Tap nep nab adañ mideb nibak, pigenimin milañ ginimiñ. ⁷God ne Kaun ne cinop ñek, ma piriñin; God Kaun ne gek, cin kilis sek midil, bin bi okok kirop midmagil lil, gos miñ goñ cin ke gos gip ar ak ma gin.

⁸Nib ak, nak Bi Kib cin minim tep ne ag ñil, nabiñ ma ginimiñ. Bin bi okok kirop abramek ag ñinimin. Yad Bi Kib minim tep ne ag ñenek, yip miñ lilak ak, nep ak rek nep nabiñ ma ginimiñ. Pen God ne kilis ne nep ñib rek, Jisas minim tep ak ag ñi ajenimin. Niğ genimin, nep gi timel genimel, gos par ma niñninin. ⁹God cinop di komiñ yokil, bin bi siñ yad ke midenigabim, agak. Cin nag tep ar ak gon niñil God cinop ma dak; ne

ke ned nig ginigain, agak rek, cinop bin bi mapin yib niñil dak. Karip lim birarik ped okok ma gi lak ñin ak, God bin bi mapin yib niñil, Krai Jisas bin bi okok kirop di komiñ yoknigab, agil gos ak niñak. ¹⁰Pen miñi, God bin bi mapin yib niñip ak, miseñ nipin. Krai Jisas apil, cinop bin bi nen agil kimak ak me, God cinop bin bi magilsek mapin yib niñip ak, miseñ yib nipin. Krai Jisas cinop bin bi nen agil yur dil kimak ak me, miñi kimeb won ak kilis alap ma mideb. Jisas nig gek ak me, komiñ midep won ak abe, komiñ per midep won ak abe, cinop bin bi miseñ yomib.

¹¹Minim tep nibak bin bi okok magilsek niñlañ, agil, Krai Jisas ne ke yip ag lek, yad Jisas minim tep dad ameb bi ne alap midil, minim tep nibak bin bi okok magilsek ag ñi tep gil, minim yipil ak ag ñi tep gil, gipin. ¹²Jisas minim tep ne ak ag ñi ajenek ak me, yip gi timel gel, koslam midebin. Pen yad kaun amek niñlig gi ma midebin; yad gos sek midebin. Bi niñ dipin ak, Bi nibak bir nipin. Yad nop tap ñibin ak, ne tap nibak di kod mid tep gil, gi dam dam, ñin kisen ak oniğab.

¹³Minim apin nipan ak, yipid gil nep mideb, agil, nak bin bi okok kirop ag ñinimin. Nig gil, Krai Jisas nop niñ dilig gi, bin bi okok kirop midmagil lilig gi, gi midenimin. Krai Jisas nop cig tep gipan ak me, nak nig ginimin rek lip. ¹⁴God tap tep ñinmagil ar nep lip ak, yiprig di tep ginimin. Kaun Siñ cinop nab adañ mideb ak, kilis ne nep gi ñek, yiprig di tep ginimin.

¹⁵Nak nipan, bin bi Esia Propins nib okok magilsek yip kirig gipal. Pigelas abe, Emogenis abe, nig akniñ rek nep gipir. ¹⁶⁻¹⁷Bi Kib ne Onesiporas bin bi karip ne okok yimig niñil di tep ginimiñ. Tari ginig: ne taun kib Rom ap midek ñin ak, nabiñ dinigain, agil, yip ma kirig gak. Yad siñaul miñ midebin, ne koslam piyo niñil, apil yip niñak. Ñin koñai nep apil niñek, yip tep yib gak. ¹⁸Nib ak, ñin kib kisen ak, Bi Kib ne Onesiporas nop yimig niñil di tep ginimiñ. Epesas midenek, yip di tep gil tap ke ke tari tari koñai nep gi ñoligip ak, nak ke niñ tep gipan.

Jisas nop cig gil, ami bi ne rek midon

2 ¹Pen ñi yad Timoti. Nak Krai Jisas nop kisen genigan ak, ne nep yimig niñil di tep ginigab. Nib ak, nak gos ar nokim nep niñil, kilis gilig gi midenimin. ²Minim tep bin bi okok kirop per ag ñibin nipan ak, bin bi Krai Jisas minim tep kisen gipal ognap piyo niñil, ag ñi tep ginimin; kiri pen bin bi ñi pai ognap kirop ag ñi tep ginigal.

³Krai Jisas nop wög gipin rek, bin bi ognap cinop gi timel gel, koslam midobin. Nak ak rek nep, Jisas Krai ami bi tep ne mideban ak me, yip ak rek nep ginigal, agil, pirikil, nop ma kirig ginimin; wög ne ak abramek ginimin.

⁴Ami bi okok, bi kib kiri ak nop tep gañ, agil, gos ar nokim ak nep nipal. Tap sön ar okok, agil, gos ak ma nipal. ⁵Bin bi resis gipal okok, bi resis kod midebal okok apal apal rek nep gil, tap tep dipal.

⁶Pen bin bi maj wög gipal okok, tiñil yur dipal rek, kiri ke ned pag ñiñnimel. Kisen bin bi ognap pag ñiñnigal. ⁷Minim agebin aul, nak niñlig gi midek, Bi Kib nep gos ñek, niñ tep ginigan.

⁸Jisas Kraiss nop gos niñlig gi midenimin. Depid ñi tikek, tik dam dapil gil, Jisas nop tik dolak. Ne kimil warikak. Jisas Kraiss minim tep ag ñibin ak, minim nibak me ak. ⁹Yad minim tep nibak ag ñenek, yip bi timel alap rek miñ lel midebin. Pen God Minim ak miñ ma mideb. ¹⁰Nib ak, God bin bi ñinigain, agil, niñ lak bin bi okok, Kraiss Jisas kirop di komiñ yokek, kiri God eip melik tep ne sek per per nep komiñ midenimel, agil, bin bi okok yip milik yapek gi timel genigal ak, yad pirikil ma kirig ginigain.

¹¹Minim pis nep niñ dep alap agniñ gebin:

Cin Jisas eip kimnok ak me,
ne eip per per nep komiñ mideniñabin.

¹²Kraiss Jisas nop wög gon,
bin bi okok cinop milik yapek gi timel genigal ak,
pirikil ma kirig ginigabin ak,
ne Kiñ midil bin bi okok kod mideniñab ñin ak,
cin ne eip midil, ak rek nep bin bi okok kod mideniñabin.
Kraiss Jisas nop ma nipin, agniñabin ak,
cinop ak rek nep, kirop ma nipin, agniñab.

¹³Pen Kraiss Jisas minim tep ageb rek ma ginigabin ak,
ne minim tep ne ageb rek nep ginigab.

Tari ginig: Kraiss per nep minim niñid nep ageb;
minim niñid nibak kirig ginimiñ rek ma lip.

God wög ag lak ak, kilis gil gi tep ginimin

¹⁴Minim ñu kil tikebin nibaul, bin bi okok kirop per per ag ñi tep gek saköl ma ginimel. Nak bin bi okok kirop ag ñi tep ginimin, Bi Kib niñ midek niñlig gi, kiri minim magil ar ak nep pen pen ag amil apil ma ginimel; minim magil pen pen agniñal ak, tap tep alap ma ginigab; bin bi minim nibak niñnigal okok, kirop gi timel yib ginigab. ¹⁵Yad God nop wög gi tep gil, minim niñid ne ak yipid gil nep ag ñi tep ginigain ak, God yip tep agniñab, agil, gos ar nokim nibak nep niñil, kilis gilig gi midenimin. ¹⁶God nop gos ma niñil minim yokop per per ag amil apil ginigal ak, nak eip ma agninin. Ag dam dapil gil, kiri God Minim niñid ak kirig gil par okok amniñal. ¹⁷Minim esek ag ñiniñal nibak, soi sikol alap lil, mid damil, kisen soi kisak kib yib lip rek ak liniñab. Bi ag ñeb bi Aimenias eip, Pailitas eip, kiri ar nibak gipir. ¹⁸Bi okok God Minim niñid ak kirig gil apal, “Cin bir wariknok; kimil kauyañ ma warikniñabin,” apal. Pen kiri minim esek nibak agel, bin bi ognap Jisas minim tep ak bir kirig gipal.

¹⁹Pen God karip sap piñil gi tep gak ak kilis mideb. Sap nab siñak ñu kil ognap mideb: “Bi Kib ne bin bi ne ke niñip.” Minim alap abe mideb: “Bin bi kiri Bi Kib bin bi ne midobin, apal okok, nag timel ar ak ma amnimel.”

²⁰Pen karip kib yib okok, kinañ ke ke mideb. Kinañ ognap, gol aka silpa dil gipal. Ognap pen mab aka lim nep dil gipal. Ognap dil, tap acir mer, tap tep tep okok nep lipal; pen ognap tap yokop abramek okok lipal. ²¹Bin bi Krajs Jisas niñ dipal okok magilsek akniñ rek nep. Bin bi an an tap acir tap abramek okok asik mosik ginigal okok, kiri bin bi siñ ne ke midil, wög tep tari tari midenigab okok kiri miñ miñ gilig gi ginigal. Nib ak, Bi Kib bin bi siñ ne ke nib okok niñil, kirop wög tep ognap ag linigab.

²²Pen bin praj bi praj ognap gos timel nipal rek ak ma niñnimin. Nak pen gi tep gil, God ageb rek nep gil, Krajs Jisas minim tep ne niñ dil, bin bi okok midmagil lil, kilis gil gi damil, bi kapkap sain tikil, gi midenimin. Bin bi midmagil asiñ ma mideb rek midil Bi Kib nop sobok gipal okok eip jim ñil midil, agesin ar nibak nep gi midenimin. ²³Pen minim yokop ag amil apil gil, pen pen tibronj tauroñ gipal bin bi okok eip ma agnimin. Tari ginig: nig genigal ak, kisen milik yapek, kal juil, minim timel agil, pen pen gos timel niñnigal. ²⁴Bin bi Bi Kib nop wög genigal okok, pen pen ma agil, kapkap midil, bin bi di tep gil, ag ñi tep ginigal. Kirop gi timel genimel, pen gi timel ma ginimel. ²⁵Pen bin bi ognap minim kirop ma denimel, kiri pen kapkap ag ñi tep gilig gi midel, God bin bi nib okok kirop gos tep ñek, tap si tap timel gipal ak tari ginig nig gipin, agil, adik gi nop ken ar apil, minim niñid yipil yib ak niñ dinimel rek lip. ²⁶Nig gil kapkap ag ñi tep gilig gi midel, gos tep apek, Seten kirop tom tom agil dek, kid ne ak midil, minim tom ne niñ dipal ak kirig gil, mid tep ginigal.

Ñin kisen nibaul bin bi gi timel yib ginigal

3 ¹Pen nak niñan, ñin kisen nibaul bin bi koslam midenigal. ²Kiri miñ goñ kiri nep gos niñil, agon kilnok kibap mani nep midmagil lil, cin nep bi kib midobin, agil, yib kiri ke dap ranil, bin bi okok kirop ag juil, nonim nap sikop kirop minim tib juil, bin bi kirop gi tep gipal okok kirop tep gip ma agil, God nop gos ma niñnigal. ³Kiri bin bi ognap midmagil ma lil, bin bi kirop gi timel ginigal ak niñil ma kirig gil, bin bi ognap kirop minim timel minim tom agil, kapkap sain ma tikil, kal timel yib gil, tap tari tari tep mideb ak niñel, kirop milik yonigab. ⁴Kiri miñ niñil, abramek gi timel gil, cin nep bin bi kib midobin agil, miñ goñ cin ke tep ginimiñ ar ak nep gil miñ miñ gin agil, God nop midmagil ma linigal. ⁵Cin bin bi nib okok niñil, bin bi God nop niñ dipal rek nep gipal, agnigabin ak pen God Kaun ne gek, kilis sek midil, God ageb rek nep gin, agil, gos ma niñnigal. Bin bi nib akniñ rek gipal okok kirig gil, eip mogim ma ginimin.

⁶Bi nib okok rek ognap, kapkap karip karip piyo am niŋ amel niŋlig gi, bin gos tep ma mideb okok, kirop wasu ag dil karip miŋan kiri dad amel, kiri minim esek kirop ag nel, bin nib okok pis ken nib okok amnigal. Bin nib okok, tap si tap timel gipin okok acir ak, titi gil lig gi yokil, mid tep gin, agil, miker kib yib niŋil, gos par niŋlig gi midebal. Pen midmagil kiri pilis gek, gos timel ke ke koŋai nep am kirop di okdaŋ okil gil, kanib timel nib okok di lip gi dad ameb. ⁷Bin nib okok rek, minim okok nib okok nib niŋnigal ak pen Kraiŋ Jisas minim tep ak niŋenigal ak, ak minim niŋid me ak, agil, ma niŋnigal. ⁸Pen bi Janis Jabris bi omal Mosis minim agak ak yo niŋrek ak rek, bi esek apal okok ak rek nep Kraiŋ Jisas minim niŋid ak yo nipal. Kiri gos timel yib nep niŋil, Kraiŋ Jisas minim tep ak kirig gipal. ⁹Pen gipal ar nibak tapin ger amniŋ rek ma lip. Janis Jabris bi omal gi timel girek, bin bi miseŋ niŋlak rek ak, bin bi miŋi nib aknib rek nep minim tom ag nibal okok ak rek nep miseŋ niŋnigal.

Jisas Kraiŋ minim tep ak niŋ di tep ginimin

¹⁰Pen nak yad eip midil, gos ar nokim nep niŋil, Jisas Kraiŋ minim tep ag nibin ak abe, nag tep ar yad gipin ak abe, nak bir niŋ tep gil nib aknib rek nep gipan. Kraiŋ nop niŋ di wös gil, wög ne kilis yib nep gilig gi, bin bi okok kirop midmagil lil, miker apek koslam midil ma kirig gipin ak, nak bir nipan. ¹¹Kraiŋ minim tep ag nenek yip gi timel gel koslam midenek ak, nak bir nipan. Bin bi taun kib Adiok, Aikoniam, Listra okok yip gi timel gel gel, koslam yib midenek ak pen Bi Kib yip di komiŋ yokak ak, nak bir nipan.

¹²Bin bi Kraiŋ Jisas nop cig gil, ageb rek nep gin agnigal okok, kirop magilsek miker nel, koslam midenigal. ¹³Pen bin bi timel minim esek ar ak nep ag nibal okok, gi timel yib gel gel amek, kiri ned bin bi timel mideliŋipal rek mer, kisen bin bi timel aknib ke midenigal. Kiri ke God kanib tep ak ma niŋil, bin bi ognap kirop minim esek nibak ag nel, kiri ak rek nep God kanib tep ak ma niŋnigal.

¹⁴Pen nak ni sikol nep midil, nep Kraiŋ Jisas minim niŋid ak ag nel, niŋil pis nep niŋ dipan minim tep ak kilis gil, niŋ diliŋ gi, ageb rek nep gilig gi, gi midenimin. Cin bin bi nep minim tep ak ag non niŋnak ak, nak cinop bir nipan. ¹⁵Nak nipan, ni sikol yib midenak nin ak, nak God Minim Siŋ ak bir niŋnak. Cin God Minim Siŋ ak uŋin li niŋenigabin ak, God Minim Siŋ ak cinop gos kid yik niŋeb won nibak nek, Kraiŋ Jisas nop niŋ don cinop di komiŋ yokniŋab minim wagiŋ ak niŋ tep ginigabin. ¹⁶God Minim ak magilsek, God ne ke ake lil Kaun ne ak piŋak. Nib ak, God Minim ak magilsek bin bi okok kirop ag nil, bin bi minim niŋid kirig gipal okok kirop timid ukil, bin bi gi timel gipal okok kirop ag gil, bin bi kiri, titi gil God Minim ageb rek gin, agil gos nipal okok kirop ag ni tep

gip. ¹⁷Nig gip ak, God nop wög gi ñeb bin bi ne okok, God Minim ak niñ tep yib gil, God kirop wög tep tari tari ag lip ak, kiri gos niñ tep yib gil, gi tep yib ginigal.

God Minim yipid gil ak ag ñinimin

4 ¹Nep minim nibaul yokop ma agebin. Krajs Jisas bin bi okok magilsek Kiñ kiri kod midenigain, agil, adik gi apenigab ñin ak, ne bin bi komiñ midenigal okok abe, bin bi kimlak okok abe, nonim ke ke linig geb. Nib ak, God abe, Krajs Jisas abe niñ mider niñlig gi, nep minim nibaul agebin. ²God Minim tep ak ag ñinimin. Bin bi okok miñ miñ ginigal aka miñ miñ ma ginigal, agil, ma yo niñnimin; God Minim miñi dinigal aka ma dinigal, gos ak ma niñnimin; kilis gil nep God Minim tep ak ag ñinimin. Bin bi gi timel gipal okok ag gil, bin bi minim niñid kirig gipal okok timid ukil, bin bi kiri, titi gil God Minim ageb rek gin, ag gos nipal okok, kirop kapkap sain tikil ag ñi tep gil, ginimin. ³Tari ginig: ñin kisen ak, God Minim yipid gil ak niñil, ma dinigal; ag ñeb bin bi koyai nep poñ dil dapel, kiri minim esek minim yokop yokop gos kiri ke ameb ar ak nep ag ñel, kiri niñil miñ miñ gilig gi dinigal. ⁴God Minim niñid ak kirig gil kesim yokop okok agel, kasek dinigal.

⁵Pen nak ke, tap tari tari ginigab ak, gos niñ tep gilig gi midenimin. Miker ap onimiñ, gos par ma niñnimin. Nak kilis gil, Krajs Jisas minim tep ak bin bi okok ag ñi ajenimin. Nak God wög gi ñeb bi mideban ak me, God nep wög tari tari ag lak ak, magilsek gi dam dam amek, pis nep gi saknigan.

Yad ulep kimnig gebin, agak

⁶Yad Krajs wög ne gen, yip miñ lel miden miden, miñi pak lon lakañ yonimiñ, agil, yip gebal. Nib ak, lim dai ar wagin aul midebin aul, kirig ameb ñin ak ulep owip. ⁷Yad kilis gil, Seten eip pen pen gi damil, kanib ulep siñak bir opin. Yad kilis gil, Krajs Jisas minim tep ak bin bi okok ag ñi dam dam amek, Krajs Jisas nop niñ dilig gi midil, wög yip agak ak ma kirig gipin; agak rek nep magilsek gipin. ⁸Ne Bi Kib, ne minim tig bilok tep gil ageb ak me, tari tari gipin ak niñ midil, ñin kib ne ak apek, yip bi komiñ tep yad, agniñab. Pen yad nep mer; bin bi, Bi Kib oniñab, agil, tep gek niñlig gi kod midebal okok, kirop magilsek ak rek nep ginigab.

⁹Timoti. Kanib midonimiñ ak, yad midebin siñaul kasek onimin. ¹⁰Bi yad eip midoligipin okok, miñi yad eip siñaul ma midebal. Bi nak Demas, tap lim dai ar wagin aul midmagil lil, yip pis nep kirig gil, bir taun kib Tesalonaika amnak. Bi yad Kresej Galesia Propins amnak. Taitas Dalnesia Propins amnak. ¹¹Bi nokim Luk nep yad eip midobir. Krajs Jisas nop wög gipin ak, Mak ne gi ñi tep gip. Nib ak, nak Mak nop amil poñ dil dapek, eip midil wög gir. ¹²Ticikas nop ag yoken Epesas amnak.

¹³Onimin ñin ak, taun kib Troas apil, kolsior par yad ak, bi nak Kapas karip di linek ak dil donimin; kanib midonimiñ ak, mij yad kom kam gi mideb okok dil donimin; mer ak, mij kaj meme sipsip wak yib sek ñu kil tiklak okok nep dil donimin.

¹⁴Bi kapa wög gip Aleksada yip gi timel yib gak. Yip gak nibak, God nop pen ak rek nep ginigab. ¹⁵Krais Jisas minim tep ag ñibin ak, Aleksada ne gi timel yib gak ak me, yip gi timel gak rek, nep ak rek nep ginimiñ rek lip ak, niñ tep ginimin.

¹⁶Yip ned minim kib aglak ñin ak, bin bi alap yip kid okok niñ midek minim kib ma agnek; kiri magilsek yip kirig gilak. Pen God kirop gos nibak niñlig gi ma midonimiñ. ¹⁷Yip minim kib aglak nibak, Bi Kib yip kod midek niñlig gi, minim tep ne ak, bin bi okok nib koñai nep apil midelak okok kirop abramek ajenek niñlak. Bi Kib gek, kaj layon yip su ñiñimiñ rek ma lak. ¹⁸Yad nipin, Bi Kib yip kod midek, tap timel alap yip ginimiñ rek ma linigab; ne yip di komiñ yokil, dam karip lim tep ne seb kab ar alañ siñak dad amniñgab. Bi Kib nibak, yib ne ak per per nep agel ar amnañ. Nib akniñ rek tep.

Pol agak, “Nibi midebim?” agak

¹⁹Bin nak Prisila abe, niñmil ne Akwila abe, bi nak Onesiporas bin bi karip ne kin midebal okok abe kirop agninin, Pol “Nibi midebim?” ageb, agninin.

²⁰Bi nak Erastas siñaul ma owak; mideb taun kib Korid siñak. Bi nak Tropimas nop tap gek, kirig onek taun kib Mailitas.

²¹Yigen kib owip ñin ak ulep mideb rek, kanib midonimiñ ak, yigen ma onigab ar ak kasek onimin.

Pen Yubulas, Pudens, Lainas, Klodia, Krais Jisas bin bi ne taun kib Rom aul midebal okok magilsek nep, “Nak mideban?” agebal.

²²Timoti, Bi Kib nep eip midenimiñ.

God nibep magilsek yimig niñil di tep ginimiñ.